

守山閣叢書

子集

守山閣叢書

子集

脈經序

脈理精微其體難辨弦緊浮芤展轉相類在心易了指下難明謂沈爲伏則方治永乖以緩爲遲則危殆立至況有數候俱見異病同脈者乎夫醫藥爲用性命所繫和鵠至妙猶或加思仲景明審亦候形證一毫有疑則考校以求驗故傷寒有承氣之戒嘔噦發下焦之問而遺文速旨代寡能用舊經秘述輿而不售遂令末學昧於源本互滋偏見各逞已能致微疴成膏肓之變滯固絕振起之望良有以也今撰集岐伯以來逮于華陀經論要訣合爲十卷百病根源各以類例相從聲色證候靡不該備其王阮傳戴吳葛呂張所傳異同咸悉載錄誠能留心研窮究其微蹟則可以比蹤古賢代無天

橫矣晉太醫令王叔和誤

宋校定脈經進呈劄子

臣等承詔典校古醫經方書所校讐中脈經一部乃王叔和之所撰集也叔和西晉高平人性度沈靖尤好著述博通經方精意診處洞識修養之道其行事具唐甘伯宗名醫傳中臣等觀其書敘陰陽表裏辨三部九候分人迎氣口神門條十二經二十四氣奇經八脉以舉五藏六腑三焦四時之病若網在綱有條而不紊使人占外以知內視死而別生爲至詳悉咸可按用其文約其事詳者獨何哉蓋其爲書一本黃帝內經間有疎略未盡處而又補以扁鵲仲景元化之法自餘奇怪異端不經之說一切不取不如是何以歷數千百年而傳用無毫髮之失乎又其大較以爲脈理精微其體難辨

兼有數候俱見異病同脈之惑專之指下不可以盡隱伏而
乃廣述形證虛實詳明聲色王相以此參伍決死生之分故
得十全無一失之繆爲果不疑然而自晉室東渡南北限隔
天下多事於養生之書實未遑暇雖好事之家僅有傳者而
承疑習非將喪道真非夫聖人曷爲釐正恭惟主上體大舜
好生之德玩神禹敘極之文推錫福之良心鑒慎疾之深意
出是古書俾從新定臣等各殫所學博求衆本據經爲斷去
取非私大抵世之傳授不一其別有三有以隋巢元方時行
病源爲第十卷者考其時而繆自破有以第五分上下卷而
撮諸篇之文別增篇目者推其本文而義無取稽是二者均
之未覩厥真各秘其所藏爾今則考以素問九墟靈樞太素

難經甲乙仲景之書并千金方及翼說脈之篇以校之除去重複補其脫漏其篇第亦頗爲改易使以類相從仍舊爲一十卷總九十七篇施之於人俾披卷者足以占外以知內視死而別生無待飲上池之水矣國子博士臣高保衡尙書屯田郎中臣孫奇光祿卿直秘閣臣林億等謹上熙寧元年七月十六日進呈奉聖旨鏤板施行

宋刻脈經牒文

國子監准監關准尙書禮部符准紹聖元年六月二十五日敕中書省尙書省送到禮部狀據國子監狀據翰林醫學本監三學看治任仲言狀伏覩本監先准朝旨刊雕小字聖惠方等共五部出賣并每節鎮各十部餘州各五部本處出賣

今有千金翼方金匱要略方王氏脈經補註本草圖經本草
筭之皆醫家要用而不可闕本監雖見出賣皆是太字官本
貧民難於辦錢請買兼外州軍尤不可得欲乞刊作小字重
行校對出賣及降外州軍施行本部看詳欲依國子監申請
事理施行狀候指揮六月二十三日奉聖旨依奉勅如右牒
到奉行都省前批六月二十六日未時付禮部施行仍關合
屬去處主者一依勅命指揮施行

宋廣西漕司重刻脈經序

碩少時母多病課醫率不効因自誓學爲方求古今醫書而
窮其原得所謂王叔和脈訣者怪其詞俚而指淺更訪老醫
得脈經十卷蓋祖黃帝岐伯扁鵲經以及於張氏傷寒論條

貫甚明真王氏書也驗之乃建本自是求之建陽書坊絕無
醫者板亦不存嘉定己巳歲京城疫朝旨命孔碩董諸醫治
方藥以拯民病因從醫學求得脈經復借各本校之與予前
後所見者同一建本也乃知脈訣出而脈經隱醫者不讀醫
者不售板遂亦不存今之俗醫問以王氏書則皆誦脈訣以
對蜀人史堪以儒生名能醫其所著方書脾胃條引脈訣中
語而議之曰此叔和知之而未盡也予每嘆曰冤哉叔和如
史載之之工尙引訣而罪經餘又何怪焉因思今世俗醫知
有朱氏傷寒百問而不知有傷寒論俗儒知誦時文而不知
誦經史其過一律也因取所錄建本脈經略改誤文寫以大
字刊之廣西漕司庶幾學者知有本原云然恨無他本可校

以俟後之仁者候官陳孔碩序

元刻脈經移文

皇帝聖旨裏江西湖東道肅政廉訪司來中備龍興路醫學
申教授謝縉翁關切惟儒學以仁義立教扶植綱常使天下
不犯刑憲醫學以仁心立教拯救疾病使生民不致天瘥故
醫之素問難經與儒之六經相爲表裏皆古聖人以利天下
後世爲心者也醫經之中王叔和脈經十卷誠爲醫門不易
之法如蒙將脈經刻布流傳誠可裨國朝好生之一端也緣
醫別無錢糧如將上項脈經於儒學內支用有餘錢糧刻布
傳遠幸甚保結關請照驗准此申乞照詳得叅詳醫學申請
刊雕脈經若於合屬學院有餘錢糧去處約量撥支工價顧

匠刊雕成書從本司收貯印行似爲便益未敢懸便申乞照
詳施行得此准申憲司合下仰照驗不妨本職從省計料合
用工匠物價鈔估體見數就行龍興路學羨餘子粒錢內支
撥刊雕申司施行須至指揮右下江西等處儒學提舉柳文
林准此泰定四年六月初四日中奉大夫江西湖東道肅政
廉訪使朶列禿

元刻脈經序

晉太醫令王叔和撰類脈經十卷其言原本黃帝內經靈樞
素問而翼之以扁鵲倉公華陀張仲景皇甫士安之論稱其
爲醫家之一經矣今脈訣熟在人口直謂叔和作而不知叔
和所輯者脈經耳當叔和時蓋未有歌括之比疑宋之中世

始次爲韻語取便講習撫其條肄而忘其根節者也熙寧中有旨出內府所藏古醫經方書命光祿卿林億等典領校讐鏤板行世而脈經與焉朱文公於慶元初跋郭長陽醫書謂俗間所傳脈訣詞最鄙淺非叔和本書世之高醫明其爲贗遂委棄之而獨有取於直指高骨爲關分前卻爲寸尺以定陰陽之位爲合於難經則脈經之傳已隱雖文公亦似未知其正出脈經也嘉定始元上遡熙寧一百四十年閩中陳孔碩借得醫局建本是書用閣本參訂互考刻之廣西漕司兵燹以來板復不存知者亦寡況望其傳哉予至江右之明年與醫學教授謝君縉翁論古書之廢慨然欲以脈經刊置學宮使人知古昔聖賢開示醫道之源委未嘗遺外於理者如

此間請於廉訪使師公公曰醫之有經取以利人利焉而傳是焉可泯子盍謀諸會承命稽覆學食錢得其羨贏以屬宗濂書院山長董天衢聚工計庸付之剞劂旣月告成其卷帙篇第一用陳氏廣西之舊而不敢輒加增損志存古也噫古書廢缺世未經見奚獨此哉惜予之心力不能以徧及之而姑識其端以俟世之君子有發焉耳泰定四年秋九月二十五日東陽柳賢述

醫家以切脈爲難事自素問難經及仲景書皆論其要至西晉王叔和始彙集諸書作脈經十卷唐孫思邈著千金方及翼方取其書爲持脈法今稱王叔和脈訣者不知起於何時惟陳無擇三因方序脈云六朝時有高陽生者剽竊作歌訣

劉元賓從而和之其說似深知脈經者而於篇後又自著七表八裏九道之名則無擇蓋亦未嘗詳讀脈經者也按脈經論脈形狀秘訣二十四種初無表裏九道之目其言芤脈云中央空兩邊實又云減則爲寒芤則爲虛寒虛相搏婦人則半產漏下男子則亡血失精又云脈浮而芤浮則爲陽芤則爲陰脈訣乃以芤爲七表之陽脈仲景辨脈法云脈浮大數動滑陽也脈沉澀弱弦微陰也而脈訣九道以動爲陰七表以弦爲陽似此之誤頗多脈經則與仲景合而經中第十卷分上下中央爲九道者的然非歌訣九道之謂也宋熙寧初林億校正脈經序中於脈訣未嘗見稱陳孔碩序始云脈訣出而脈經隱愚疑脈訣或熙寧以後人所作是不可得知也

縉翁先世藏脈經官本及廣西本竊嘗誦而習之後又得鄉人黃南牖家本校讐無誤竭來豫章幸受知憲使師公及儒學提舉柳先生閒請刻之儒學以惠久遠二公不鄙其言慨然成之自今而後學者得見是經而用其心則歌訣之舛者不待辨而自見矣經中頗有疑字不敢輒改辨而正之姑俟後賢泰定四年歲次丁卯閏九月旣望龍興路醫學教授謝縉翁敬書

脈經卷之一

守山閣叢書 子部

晉王叔和撰

金山錢熙祚錫之校

脈形狀指下秘訣第一

平脈蚤晏法第二

分別三關境界脈候所主第三

辨尺寸陰陽榮衛度數第四

平脈視人大小長短男女逆順法第五

持脈輕重法第六

兩手六脈所主五藏六腑陰陽逆順第七

辨腑藏病脈陰陽大法第八

辨脈陰陽大法第九

平虛實第十

縱橫逆順伏匿脈第十一

辨災怪恐怖雜脈第十二

遲疾短長雜脈第十三

平人得病所起脈第十四

診病將差難已脈第十五

脈形狀指下秘訣第一

二十四種

浮脈舉之有餘按之不足

浮於手下

芤脈浮大而軟按之中央空兩邊實

一日手下無兩傍有

洪脈極大在指下

一日浮而大

滑脈往來前卻流利展轉替替然與數相似

一日浮中如有力一日漉漉如